

20.10.78 nr 80

Casper Derungs, Sedrun

(20-4-1911-28-9-1978)



Duas petgas han marcau la veta da quei um: Il pitir ed il humor. Atgnamein dus muments che secrodan mal in cun l'auter. E tuttina ei quei stau realisabel ella veta da nies aug Caspar.

Naschius sco fegl da Gion Michel ed Onna Maria Derungs-Jacomet ha el pas-

sentau tut sia affonza e giuentetgna, gie l'entira veta a Sedrun. Gia da giuven fuva el mudergiaus d'ina maligna malsogna, quasi nunveseivla, e che mo paucs sminavan. Quella ha buca lubiu agli de sededicar ad ina lavur cumpleina u da fundar famiglia. Perquei ha el viviu pli che 25 onns tier sia sora Rosa Jacomet-Derungs. Ella e sia famiglia han procura exemplaricamein per in cauld igniv pigl aug Caspar. Lavurs denteren ha el fatg a biars. Mo quei che vegn a restar en memoria a biars parents ed enconuschents ei siu nunballuccabel humor, sia originalitat e – quei ch'ils pli paucs savevan – siu saver e siu interess per l'istoria, surtut per l'istoria dalla secunda uiara mundiala. Cheu savevan nus nevs e niazas tedlar uras ora, co el plidava da Rommel e da Mussolini. In talent da raquintar tut aparti haveva el.

Ed ussa ruaussan sias restonzas terrestras sper la tuor da s. Vigeli a Sedrun. A ses fargliuns, a ses numerus nevs e niazas ed als affons da quels vegnan il humor, las teccas e stuccas da nies bien aug Caspar a muncar. – En num da tuts engraziel a Ti per tut. – Ruaussa ella pasch dil Segner.

Tiu nevs Silvio Deragisch